



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

20. Kalenderwoche – ab 17. Mai 2009

Wundorlisch

Dor Mänsch is werglisch eene ganz wundorbare Sache. De reense Wundordiede! Nee, was isch misch widdor in dor ledzdn Woche ibor misch - so als Mänsch - gewundord hab...!

Da hab isch am Been, also am Oborschängl, e baar Biggl gekrischd. So off eem Flegg e baar Dudzend. Eene kleene Bigglhärde. Bledzlish un vellisch unerwarded!

Isch wollds erschd gahr nisch gloom. Wo sinn die Biggls bloß hährgekomm? Un warum? Hab isch was Falsches gegessn? Habsch misch irschendwo mid was angeschdeggd? Abor mid was? Un wie? So am Oborschängl dursch de Hose dursch, dud mor sisch doch nisch anschdeggn? Odor doch? Odor is mir e Vieh in de Hose neingegrabbeld un had dann am Oborschängl genised un Eior geleschd? Abor warum dann grade am Oborschängl? Frachn ibor Frachn!

Un dann nadiehrlich de Haubdfache - wie gefährlich sinn die Biggls? Kann mor an solsche Biggls schdärm? Odor sinn die villeischd sogahr noch schlimmor?

Se sehn zwahr reladief harmlos aus die Biggls, un se hamm sisch ooch nisch in Windeseile ibor dähn ganzn Görbor ausgebreided... - nee, das hab isch die ganzn Daache genau beobachded - ausgebreided hamm se sisch nisch die Biggls! Abor se sinn ooch nisch weggegang! Isch hab se immor widdor scharf angeguggd - die sinn dagebliehm, als wie wennse nie weggehn wölldn!

Abor wieso hab isch die Biggl gegrischd? Odor bin isch einfach ma dran gewähsn?

Zugegähm - isch hadde lange keene schwähre Grangheid mähr... - wenn isch ma jedzde von dähm Schnubbn in dor Vorweihnachdszeit absähn will... dähm hab isch ja mid Lisd un Digge iborschdandn! Abor nu gleisch eene Härde Biggls?!

Zum Arzd wolldsch abor nisch gleisch renn. Die hamm ja ooch ohne misch genuch zu dun. Un außordähm... währ eema zum Arzd gehn dud, dähr kommd ja nie mähr davon los! Nee, zum Arzd gehn söllde mor werglisch erschd, wensde Rendnor bisd odor arbeitslos. Dann hasde Zeid fiehr Arzd un Grangsein un so. Es dud ja bekanndlich keene gesundn Leide gähm, bloß welsche, die noch nisch beim Arzd warn!

Nee, isch wolld nisch gleisch hingehn. Fiehr eene große Garjähre als Grangor isses bei mor eenfach noch zu frieh. Abor nu die Biggls! Wern die misch womeeschlich am Ende daderzu zwing, zum Arzd zu gehn?

Nadiehrlich hab isch de einschläschische Fachlidderraduhr schdudierd, abor nirschendwo sinn die Biggls offgedauchd, die isch hab. Eene gewisse Ähnlichkeed haddn se heeschdens mid dor Girdlose. Bloß dass die ehm nie am Oborschängl is. Nee, bin isch geschbannd wie das mid meine Biggls ausgehn dud! Hochindressand! Das hädde isch von Biggls nisch erwarded.

Un irschendwie... also irschendwie sinn se mir ja fasd schon e bißl ans Härz gewagsn. Wennse weggeh dun, dädn die mir womeeschlich fähln? Nee, dor Mänsch is schon sähr wundorlich!

Eduard Sachsenmeyer